

錢  
志  
新  
編

錢志新編卷五



雲間張崇懿麗瀛校輯

晉

武帝姓司馬名炎祖懿仕魏官太傅父昭襲懿職封晉王至炎遂篡魏稱帝在位二十五年壽五十五改元凡四泰始十咸寧五太康十太熙一按帝承魏氏刻薄奢侈之後矯以仁儉及平吳漸事遊宴掖庭殆將萬人司隸劉毅比之桓靈焉傳惠帝懷帝愍帝劉聰滅之是爲西晉計五十二年元帝渡江卽位再傳明

帝成帝康帝穆帝哀帝廢帝簡文帝孝武帝安帝恭  
帝凡十一主計一百零三年是爲東晉劉裕篡之兩  
晉統計凡一百五十五年起乙酉終己未

太元貨泉此錢舊譜所未載有二品一品太元二字  
作楷文者恐是僞錢按晉孝武帝曾號太元者二十  
一年或爲當時所鑄然已無可攷證姑附此



宋



武帝姓劉名裕字德興小字寄奴彭城人漢楚元王二  
十一世孫世居丹徒之京口里祖靖安東太守父翹  
郡公曹母趙氏未生裕數日前屋上紅光燭天及生  
時甘露降於庭生未三日母旋卒家貧不能僱人乳  
父將棄之從母張氏抱歸乳之得不死及長風骨奇  
特勇健絕倫粗識文字仕晉錄尚書事封宋公篡晉  
稱帝在位三年壽六十七改元永初傳廢帝文帝孝  
武帝中廢帝明帝後廢帝順帝凡八主共五十九年

起庚申終戊午蕭道成篡之



文帝名義隆武帝第三子甫卽位立誅三逆英明過人  
且仁孝恭儉勤於政事綱維悉舉三十年四境晏然  
江在風俗於斯爲美但心雄而力不量故邊境多事  
任好殺之王元謨而不知惑譏而殺檀道濟爲世所  
訾笑後爲逆子邵所弑在位三十年壽四十七改元  
元嘉

四銖錢按宋書文帝紀曰元嘉七年冬十月戊午立  
錢署鑄四銖錢張台曰錢之背面皆有周郭徑七分

重二銖文甚分明洪志曰此錢徑七分重二銖四參肉薄好舊譜曰四銖錢重如其文恐有此二品耳





五銖當兩錢按文帝紀曰元嘉二十四年六月以貨貴制大錢一當兩明年罷宋略曰因民不便故罷舊譜曰重八銖文曰五銖



孝武帝名駿初封武陵王文帝被弑起兵誅邵卽位在位十一年壽三十三改元二孝建三大明八按帝但嘲侮公卿繡室錦宮構蒲百萬笑高帝儉素爲田舍翁沉湎於酒荒淫於色誅戮諫臣翦滅昆弟不顧人倫其獲免善終幸也

孝建四銖按宋書曰孝建元年春正月更鑄四銖錢顧烜曰其錢一面爲孝建一面爲四銖舊譜曰徑八分重四銖孝建二字則薤葉四銖二字則大篆後專用孝建二字漸至薄小至明帝泰始三年始行停鑄

洪志曰其錢徑七分重二銖







中廢帝名子業在位一年壽十七改元永光又改景和  
按帝幼卽不孝及踐位悖虐恣淫更甚於孝武無復  
人理射鬼竹林堂爲壽寂所弑蓋自湘中眞天子出  
而賸天子果不及熟矣

二銖景和錢按宋書曰永光元年春二月鑄二銖錢  
三月罷舊譜曰文爲二銖無輪郭重如其文顧烜曰



景和中又鑄景和錢重一銖較孝建更薄小金光襲  
曰其文小篆



齊

高祖姓蕭名道成字紹伯小字闕將漢相國蕭何廿四

世孫整過江居武進縣東城里



即蘭陵

整生雋雋生樂

子樂子生承之少有大志仕宋官龍驤將軍南泰山  
太守封五等男有惠政道成其長子也姿表英異麟  
文遍體年十三治禮記及左氏春秋過目輒曉仕宋  
官太傅大都督中領軍封齊公篡宋稱帝在位四年  
壽五十四改元建元留心政事草晉宋以來因仍之  
弊躬勵節儉身不御精細之物嘗曰使我臨天下十

年當使黃金與土同價故百姓號稱豐樂焉傳武帝  
前廢帝後廢帝明帝東昏侯和帝凡七主共二十三  
年蕭衍篡之起巳未終辛巳

按齊武帝永明八年十月鑄五銖錢重五銖一依漢  
法頃之以工費不給而止








## 梁

武帝姓蕭名衍字叔達小字練兒父順之齊高帝叔也  
封臨湘侯居秣陵縣母張氏見菖蒲花光艷異常因  
取而吞之遂生衍狀貌奇特頂有白光身映日無影  
兩髀駢骨有文在右手曰武爲兒時能蹈空而行及  
長博學能文有文武才幹仕齊至相國封梁王篡齊  
稱帝在位四十八年壽八十六改元凡七天監十八  
普通七大通二中大通六大同十一中大同一太清  
三傳簡文帝元帝敬帝凡四主共五十五年起壬午





終丙子陳霸先篡之按帝孝慈恭儉一材一藝無不  
精絕初政可觀民安物阜天監四年斛米賤至三十  
錢繼惑於佛捨身同泰寺後納侯景以三度捨佛之  
身竟於臺城餓死荷荷而崩惜哉

梁書武帝紀曰普通四年冬十二月始鑄鑊錢顧烜  
曰徑一寸文曰五銖又鑄大吉五銖大通五銖大富  
五銖背均有四出文大小輕重與鑊五銖同









五銖女錢隋志梁武帝天監元年鑄張台曰背有好郭謂之公式女錢背無好郭單謂之女錢蓋聽民私鑄有不精也顧烜曰徑一寸重五銖





敬帝名方智在位三年年十六改元凡二紹泰一太平  
二按帝雖無失德然遭家不造梁祚已移而獨悲其

爲霸先所弑而篡也梁書曰太平二年夏四月鑄四柱五銖錢一準二十後改一準十又有一柱兩柱者大者柱在面之中小者柱在幕之右兩柱亦在幕右



雙五五銖亦云梁錢按舊譜曰此錢徑八分重二銖四參五字連綴肉郭





鵝眼五銖梁末所鑄顧烜曰此錢入水不沉隨手破碎尺帛斗粟動輸一萬徑六分重五分字隆起無輪

郭





五朱錢爲梁時錢顧烜曰徑七分半重三銖文曰五朱源出稚錢但以銖爲朱三吳屬縣行之



太平百金太平百錢梁時民間私鑄也顧烜曰此錢



三種並徑一寸重四銖又小者徑七分重二銖半



定平一百食貨志曰梁時百姓私以舊錢交易有定平一百顧烜曰徑六分重一銖半三吳屬縣行之





陳

武帝姓陳名霸先字興國小字法生吳興長城人漢太  
邱長陳實之後晉太尉準之孫達爲長城令遂家焉  
嘗曰此地山川秀麗當有王者興我子孫必鍾斯運  
越八傳至文讚遂生霸先垂手過膝倣儻有大志旣  
長不事生產愛兵書有經天緯地之才濟世安民之  
略仕梁至尙書令長城縣侯篡梁稱帝在位三年改  
元永定壽五十九傳文帝廢帝宣帝後主凡四主共  
三十二年起丁丑終戊申隋文帝滅之

文帝名憐武帝之姪在位七年壽四十五改元二天嘉  
六年康一按帝起自艱難知民疾苦春夏不斷死刑  
投鐵階石之上鏘然有聲眠亦驚覺可謂勵精圖治  
一矣獨惜其在位未久旋卽升遐托孤非人嗣主失位  
不無遺憾焉



布泉董道曰天嘉二年鑄錢曰布泉玉筋文以一當  
百三年改鑄五銖錢一當鵝眼之十



宣帝名頊廢其主伯宗而自立在位十四年壽五十二  
改元大建按帝負兄攘姪以有天下詐橫甚矣雖青  
牛卻獻焚錦雲龍以示儉德猶不足取况復五后並  
寵羣宦專權遊宴沉湎更以貪地侵齊得隴望蜀遂  
至師敗國蹙乃昵愛太子師傅匪人卒以亡國儲貳  
之訓可少忽乎

太貨六銖陳書曰大建十一年秋七月初行太貨六  
銖錢隋書食貨志曰以一當五銖之十人皆不便乃  
相與謠言曰太貨六銖錢義腰哭天子未幾帝崩蓋

篆文六字類人之義腰耳洪志曰此錢形制精好肉背皆有周郭徑一寸重如其文



錢志新編卷六


雲間張崇懿麗羸校輯

北魏

太祖道武帝姓拓跋名珪其先黃帝之後昌意少子受封北國有大鮮卑山因以爲號曰鮮卑索頭部傳至毛始大十三世生詰汾畋遇天女與之相偶期而復遇抱一子授之曰此君子善視之子孫相承當世爲帝王子卽力微也力微之後曰猗盧者晉初封代公愍帝時進爲王九傳至拓跋珪自立爲代王其俗謂

土爲拓后爲跋因以爲氏晉隆安二年僭稱帝據平  
城國號魏能恢拓中原留心經術制度規模實絕一  
時但荒於色慾爲子所弑傳明元帝太武帝文成帝  
獻文帝孝文帝宣武帝孝明帝臨洮世子孝莊帝節  
閔帝廢帝孝武帝自此魏分東西東魏孝靜帝高洋  
篡之孝武奔長安爲西魏傳文帝廢帝恭帝宇文覺  
篡之凡一十七主計一百七十二年戊戌終丁丑  
孝文帝名宏在位三十年壽三十四改元凡三延興六  
承明一太和二十三遷都洛陽改姓元氏儉約寬慈

制作明備江左五朝莫及尤好讀書五經百家無不  
淹貫文章詩賦有時馬上口授及成不改一字焉  
太和五銖魏書食貨志曰太和十九年鑄太和五銖  
錢洪志曰此錢徑八分重五銖銅質粗惡





宣武帝名恪在位十六年壽三十二改元凡四景明四  
正始四永平四延昌四按恪弱冠踐祚不親庶務寵  
倖茹皓及外戚高肇等用事且好浮屠造佛寺至一





萬三千之多以致魏業浸衰


五銖魏書食貨志曰世宗永平三年鑄五銖錢其錢較漢五銖畧小濶邊五字交股作直筆與永安五銖之五字同後隋文帝白蠟五銖錢亦遵此制



孝莊帝名子攸在位四年改元二建義一永安三按子攸之世魏政已敝雖號英敏能謀手刃將軍爾朱榮然卒爲榮之子兆反賊所執尋弑於佛寺

永安五銖魏書食貨志曰永安二年秋詔鑄永安五銖錢至三年正月止此錢遷鄴之後輕濫尤多武定初齊文襄奏革其弊詔遣使諸州鎮收銅及錢悉更改鑄其文仍舊洪志曰此錢當係東魏董道謂之北齊非也或云東西魏皆鑄永安錢故存近世極多其品有三一光幕一背文四出一幕有土字者高澄所鑄百鎰號令公百鎰錢舊譜曰徑九分重如其文








北齊

文宣帝高洋者景州蓨人父歡仕東魏至大丞相封渤海王至洋尋篡魏稱帝凡十年改元天保初決斷英敏獨出懷抱征伐四克威鎮戎夏不旋踵以勲業自矜酒色昏狂肆行淫暴祖身露體塗粉黛宿街巷從者不堪而居之自若高氏婦女無親疎皆使左右爲亂於前無媿也傳廢帝孝昭帝武成帝後主幼主凡六主共二十八年起庚午終丁酉周武帝滅之

常平五銖北齊書曰天保四年春正月鑄新錢文曰

常平五銖隋書食貨志曰文宣鑄常平五銖重如其文其錢甚貴製造甚精舊譜曰徑八分李孝美曰徑寸又有一品大常平背有七星及日月形




北周

孝閔帝宇文覺者代郡人本出匈奴別種其始祖葛烏  
兔有孫曰普回得黃帝玉璽北俗謂天子爲宇文因  
以爲氏十三世生泰仕魏有功封周王子覺嗣位遂  
移魏祚傳明帝武帝滅北齊再傳宣帝靜帝凡五主  
共二十四年起丁丑終庚子隋文帝篡之

武帝邕小字彌羅突在位十八年壽三十六改元凡四  
保定五天和六建德六宣政一按邕能夷平內難以  
報兄仇尊儒術斥釋道崇節儉省妃嬪任用賢才愛


恤士庶用法以斷數年間平齊除暴功亦烈哉其布  
德立行皆能度越前人真英武之君也第傳子不肖  
旋亦亡國甚可慨也

布泉周書武帝紀曰保定元年秋七月更鑄錢文曰  
布泉以一當五與五銖並行建德五年春廢舊譜曰  
徑一寸乃玉筋篆非男錢之布泉也



五行大布周書曰建德三年六月更鑄五行大布錢

以一當十與布泉並行四年秋七月禁不得出入關  
 布泉聽入而不出舊譜曰徑一寸一分張台曰此錢  
 有小者徑止六分其文上五下行左大右布又有大  
 布二字翻在上下者又一品背有龜蛇星劍者




宣帝贊者武帝之子在位一年改元大成又改大象壽  
 二十三爲世子時已多失德及嗣位荒淫殘暴極意  
 逞志自比上帝不喜人有高大之稱立五后自稱天



元皇帝旋自爲太上皇傳位於子闡是爲靜帝方七歲凡二年改元大定賀未幾卒皇太后父楊堅篡之北周亡

永通萬國周書宣帝紀曰大象元年十一月丁巳初鑄永通萬國錢以一當十與五行大布並行舊譜曰徑寸三分重十二銖輪郭與布泉相似其小者徑七分有輪郭濶厚及對文者張台曰徑寸二分重八銖李孝美曰此錢尙有一品徑寸五分重十八銖背面皆有此四字者銅色青白制作尤極精工但流傳於



世甚少故未易觀耳又有一品背文有龜蛇星劍者亦不能多得



成

李雄者巴西氏人其先廩君之苗裔成都王李特之子  
據成都稱帝按秦始皇時有長人長五丈見於宕渠  
秦史胡毋敬曰五百年後其地必有異人爲大人者  
雄之稱尊號其先出自宕渠識者皆以爲長人之應  
雄僞諡太宗傳廢主班幽帝期中宗壽改國號爲漢  
改元漢興凡六年再傳末主勢桓溫滅之凡五主共  
四十四年起晉惠帝永興元年甲子終穆帝永和三  
年丁未

漢興錢顧烜曰徑五分重一銖半文曰漢興小篆文  
此錢今尙有之舊譜以爲西漢時所鑄非是





後趙

石勒者武鄉羯人據襄國按勒年十四隨人行販至洛陽王衍見而異之恐其爲天下患遣人收之則勒已亡去得免按勒雖不學而雅好文史嘗令儒生讀史傳聽之每以己意論古帝王善敗之故往往暗合其英達如此僞諡曰高祖傳少帝宏太祖虎廢主世石遵石鑒石祗凡七主共三十三年冉閔滅之起晉元帝大興二年己卯終穆帝永和七年辛亥

豐貨晉書石勒傳曰勒鑄有豐貨錢舊譜曰徑一寸


重四銖世謂之富錢言收此錢能令人豐富也洪氏  
曰徑九分重三銖輪郭深好



北燕

馮宏者兄拔爲後燕將軍得罪於燕主熙亡命山澤潛入城作亂推熙養子高雲爲主執熙殺之後雲爲其臣離班桃仁所殺跋遂斬桃仁而自立跋卒弟宏殺子翼而篡之建元太興魏伐之奔高麗後復爲其下所殺自跋至宏共計二十八年起晉安帝義熙五年己酉終宋文帝元嘉十三年丙子

太興錢董道曰太興平寶錢張台云馮宏鑄李孝美曰徑八分重四銖背有一丁字世誤爲遼聖宗錢





錢志新編卷七

雲間張崇懿臞瀛校輯

隋





隋本從隨帝以屢經兵戈  
擾攘因去走而爲隋

高祖姓楊氏名堅小字那羅延宏農華陰人漢太尉震  
之後九世孫元壽仕北魏爲武川鎮司馬子孫因家  
焉元壽元孫忠仕魏及周封隨國公子堅襲父職遂  
篡周滅陳撫有華夏在位二十四年改元二開皇二  
十仁壽四壽六十四按帝勵精圖治薄賦輕徭愛養  
百姓自奉儉素天下化之第舞智嚴刑盜一瓜一錢

者立斬且惑於后廢勇立廣迨廣惡昭著始抵床而  
恚晚矣卒爲廣所弑傳煬帝爲宇文化及所弑恭帝  
降於唐封鄴國公又越王立未幾爲王世充所弑隋  
亡凡四主計共三十七年起辛丑終丁丑

白鑑五銖隋書曰開皇元年九月初行五銖錢食貨  
志曰以錢貨輕重不等乃更鑄新錢背面皆有周郭  
文曰五銖重如其文每千重四觔二兩又漢王諒於  
并州立五銖晉王廣於鄂州置十鑪蜀王秀於益州  
立五鑪均鑄此錢大業以後遂多私鑄每千漸至重

一觔更或剪鑲鑠裁皮糊紙以爲錢舊譜曰重一銖  
 六黍肉郭平濶右邊傍似有一畫其三面無郭用鑠  
 和鑄故錢色白俗謂之白鑠音臘卽今  
 點銅錫錢



雞目五銖按稗史彙編曰隋文帝鑄小五銖八九萬  
 方滿斛又陳文帝及北魏梁末均有此錢




唐

高祖姓李氏名淵字叔德隴西成紀人裔出漢李陵後  
西涼武昭王暕七世孫暕曾孫熙家於武川生子虎  
仕西魏爲柱國賜姓大野氏始居長安周追封唐國  
公虎子昞卽帝父也爲隋文帝相復姓李氏帝以太  
原留守受隋禪舉晉陽精兵掃除羣亂席捲長驅滅  
夏楚燕梁秦鄭皆太宗之功也在位九年壽七十三  
改元武德傳太宗高宗中宗武后睿宗元宗肅宗代  
宗德宗順宗憲宗穆宗敬宗文宗武宗宣宗懿宗僖





宗昭宗昭宣帝凡二十一主統計二百七十九年起  
戊寅終丙寅朱溫篡之

開元通寶錢舊唐書曰開元錢之文歐陽詢書其字  
八分及隸體俗謂之開通元寶食貨志曰武德四年  
鑄開元通寶錢徑八分重三銖四參積十錢重一兩  
鄭虔曰初進蠟模文德皇后指一甲跡故錢背有指  
文洪志曰此錢終唐之世相繼冶鑄故獨多又有光  
幕





高宗名治小字雉奴在位三十四年壽五十六改元凡十四永徽六顯慶五龍朔三麟德乾封總章各二咸亨四上元二儀鳳三調露永隆開耀永淳弘道各一起庚戌終癸未帝初卽位遂良無忌同心輔政有貞觀遺風及納武氏穢亂宮掖唐祚幾覆焉

乾封錢新唐書食貨志曰乾封元年改鑄乾封泉寶錢徑一寸重二銖六分以一當十踰年而舊錢多廢米帛涌貴復行開元錢其乾封錢詔令所司貯納更不須鑄余又有顯慶重寶一枚大小似折二







肅宗名亨元宗子在位七年壽五十二改元凡四至德  
乾元上元各二寶應一起丙申終王寅按帝任子儀  
光弼等收復兩京重興社稷有足稱者乃愛張良娣  
寵李輔國殺太子遷上皇何多失德歟況有一李泌  
不能用致楚州河東朔方之軍亂於外張后越王死  
王之殺亂於內上不保其父中不保其身下不保其  
妻子爲後世笑也

乾元錢唐書食貨志曰乾元元年經費不給鑄乾元重寶錢以一當十肅宗實錄曰乾元元年九月鑄乾元錢舊譜曰徑寸二分重五銖食貨志又曰第五琦爲相命絳州諸爐鑄重輪乾元錢以一當五十後減當三十金光襲曰背之外郭重輪有二品又乾元二年鑄乾元小錢以當一








代宗名豫初名俶肅宗之子在位十七年壽五十二改  
元凡三廣德二永泰一大歷十四起癸卯終已未按  
帝初能尙賢任武僇力功成後信用宦官典禁兵勢  
傾朝野匿鄴侯於江西置汾陽於閒散致懷恩忿怨

作寇太原逐節度者命留後擅殺兵馬者與刺史紀綱大壞終唐之世不復能振焉


大歷錢代宗實錄曰大歷四年正月乃開內道鑄錢等使宰相第五琦請於汾陽銅源兩監各增置五鑪許之洪氏泉志曰此錢重二銖六參徑九分銅色昏濁而字畫道勁




德宗名适代宗之子在位二十五年壽六十四改元凡

三建中四興元一貞元二十一起庚申終甲申按帝  
初能親勤政事罷四方貢獻振肅紀綱不旋踵信任  
奸邪括商錢稅閒架括克聚歛民不聊生朱泚李懷  
光等相繼作亂幸罪已詔下收拾人心令公李晟復  
京城重安社稷云

建中錢唐書食貨志曰建中初戶部侍郎韓洄請復  
洛源廢監起十爐鑄錢十萬二千緡從之張台曰其  
錢小於開元文曰建中通寶銅色純赤字文漫暗而  
肉郭則甚好民間往往有之




開元大錢食貨志曰判度支趙贊採連州白銅鑄大錢以一當千以權輕重洪志曰此錢徑寸三分重十二銖銅質渾厚字文明坦曰開元通寶



穆宗名恒憲宗之子在位四年壽三十改元長慶起辛

丑終甲辰按帝能誅李直臣用李聽復韓愈官免欠錢庶知要者然殢聲色樂遊畋縱藩臣殺節度使幽州成德相繼告亂由是再失河朔不能復取焉



長慶錢按通鑑曰長慶元年九月戶部尙書楊於陵請廣鑄錢而禁滯積及出塞則錢日滋從之



敬宗名湛穆宗之子在位二年年十八改元寶歷起乙巳終丙午按帝能知裴度之賢雖誣謗盈耳不爲動

搖仍用爲相復厚待李德裕韋處厚李絳等有足取者然不能去八關十六子之附權亂政更嬉遊濫賞性復褊急因球場夜獵宦官蘇佐明滅燭弑之兩日之內三易其主焉



寶歷錢按此錢制作與開元乾元等錢同前譜未載



武宗名炎文宗之子在位六年壽三十三改元會昌起辛酉終丙寅按帝能相德裕而澤潞平藩鎮幾清不


敢有異志不特駕馭藩臣亦且善制奄寺更能力除  
浮屠盡髮天下僧未幾惑於黃老仍歸異端服金丹  
至疾發猶信以爲換骨竟成不諱

開元錢食貨志曰武宗廢天下佛寺以銅鐘佛像鑄  
錢文仍開元幕上皆鑄州郡名有襄興洛益昌藍荆  
潤潭梓桂越京等字不能悉舉錢制不甚工



懿宗名溫更名灌宣宗之子在位十四年壽三十一改

元咸通起庚辰終癸巳按帝信任奸邪疎遠忠直尊  
敬釋教親自唱經其愛女同昌公主適韋保衡傾宮  
中珍玩爲資送每物至百二十輿軍逐其帥民逐其  
主而不問龐勛造逆李國昌等討平之功爲最烈反  
爲牛頭所誣十四年間敗壞唐室無寸善焉  
咸通錢舊譜曰咸通十一年桂陽監鑄咸通元寶錢  
旋敕停廢







附史思明

史思明者本名宰干營州雜胡與安祿山同里開先  
後一日生及長相親愛以驍勇聞同爲節度使張守  
珪部將元宗賜名思明祿山旣爲子慶緒所殺慶緒  
復被思明所逼奉璽綬讓思明思明陽約爲兄弟請  
插血盟慶緒旣來乃縊殺之乾元二年正月思明遂  
反自稱大燕皇帝據范陽改元得壹已而惡得壹非  
長久之兆復改順天以一當開元錢百上元二年又  
改應天思明猜忌好殺爲子朝義部將駱悅等縊殺

之旋爲唐兵所滅按野客叢書載龐元英文昌錄曰  
後唐同光三年洛京馬步使朱守殷於積善坊役所  
得古錢四百五十六文得壹元寶四百四十文順天  
元寶沈存中筆談曰熙寧中發地得大錢三十餘千  
皆曰得壹順天攷唐書史思明據東都鑄得壹元寶  
徑一寸四分以一當百字文方重如顏體輪郭甚古  
今此二錢人家往往有之又按舊譜曰得壹元寶錢  
徑一寸三分重十三銖順天元寶錢徑一寸五分重  
十五銖




錢志新編卷八

雲間張崇懿麗瀛校輯


後梁

太祖朱溫者更名晃碭山縣人少無賴性復兇悍入黃  
巢黨爲盜後見巢勢日蹙乃降唐昭宗以爲河中招  
討使賜名全忠已拜節鎮封梁王遂篡唐卽位六年  
壽六十一改元凡二開平四乾化二起丁卯終壬申  
恣意聲色嘗避暑張全義家亂其婦女殆遍復縱淫  
子婦八人入侍而假子友文婦尤美艷最寵至欲以

友文爲嗣主次子友珪懼以兵夜入溫驚起怒曰恨不早殺此賊友珪高聲罵曰老賊萬段刺之洞胸而死以敗瓊裏屍埋於寢殿遂自立友貞起兵討之珪乃自殺友貞卽位大梁凡十年壽三十六改元凡二貞明六龍德四晉王李存勗兵至汴友貞自焚死皆追廢爲庶人梁亡共二主計十七年起丁卯終壬午開平錢按張敏庵泉寶錄載有開平通寶錢



鳳歷錢按友珪既自立改元鳳歷凡僭十月敗死又  
攷大理段智運亦曾號鳳歷余近得鳳歷通寶錢一  
枚諸譜所未載然莫可證據姑附此



## 後唐

莊宗李存勗者西突厥沙陀人本姓朱耶至唐懿宗時  
朱耶赤心以功拜振武節度使賜姓李名國昌子克  
用復破黃巢復長安功居第一封晉王克用一目微  
眇以其驍勇世謂之獨眼龍少時從父獻捷至京昭  
宗撫其背曰是兒奇表後當富貴及唐亡王建遺書  
克用請各帝一方乃答書云誓於此身靡敢失節及  
卒子存勗能繼父志滅燕滅梁卽帝位國號曰唐改  
元同光凡三年壽三十五起癸未終乙酉惜荒惑於


色淫於遊獵尤酷好伶人趙在禮反幸關東招撫旋  
師至洛城優人郭從謙作亂爲流矢所中殂五坊人  
善友聚樂器而焚之衆遂推嗣源爲帝是爲明宗傳  
閔帝廢帝凡四主計一十三年起癸未終乙未石敬  
瑭反廢帝自焚死唐亡

明宗李嗣源者本夷人無姓氏名邈佶烈太祖克用愛  
其勇乃養爲子賜名嗣源後更名重軍中號曰李橫  
衝莊宗旣殂遂卽帝位凡八年改元二天成四長興  
三壽六十七起丙戌終癸巳按史稱帝自以爲胡人



不敢當中國主每夜焚香祝天願早生聖人爲生民  
主故兵革罕用歲屢豐熟號爲賢君焉

天成錢宋白續通典曰天成元年十二月敕中外所  
使銅錢內鑄鑑錢卽宜毀棄二年八月禁銷銅錢四  
年禁鑄鑑錢洪志曰天成錢徑九分重三銖六參文  
曰天成元寶而五代史唐紀缺而不載



## 後晉

高祖石敬瑭者出於西夷自梟獍雞歸唐生敬瑭始以石爲姓官河東節度使爲明宗愛嬖篡唐卽帝位改國號曰晉建元天福凡七年壽五十一起丙申終壬寅按帝以契丹兵入洛陽移唐祚遂尊契丹主爲父皇帝獻幽薊等一十六州致書自稱兒皇帝如家人禮猶數被責讓憂憤而殂馮道背顧命立兄之子齊王重貴爲主是爲出帝昏庸無道敗壞人倫契丹入寇擄之比去封爲負義侯徙居黃龍府晉亡凡二主

計一十一年起丙申終丙午

天福錢白續通典曰天福三年戊戌十一月詔三京諸道無問公私積有銅者並許各自鑄錢以天福元寶爲文鑄錢樣頒下諸道每一文重二銖四參又鄭向曰晉高祖天福三年十一月詔建錢鑪於欒州洪氏泉志曰此錢徑七分銅質薄小文字昏昧不精重二銖四參董道曰天福石晉年號當時鑄有天福鎮寶錢文見晉氏舊史洪志曰此錢面文湮沒流傳於今甚多李孝美曰天福鎮寶錢徑八分重四銖六參

背文有一黎字在於穿上





後漢

高祖劉嵩者初名智遠本西突厥別種沙陀人後徙太原爲李氏贅婿仕晉拜河東節度使擁精銳之兵居形勝之地時出帝北去中原乏主諸將勸進於是先正位號然後出師議括民財以賞將士聽李后諫悉出宮中所有以勞之中外悅服旋改國號爲漢建元乾祐凡二年而殂壽五十四傳隱帝時大臣多武夫將相如水火帝又好遊嬉厭爲史宏肇等所制遂殺之遣使往鄴殺郭威威因舉兵反帝兵敗遁入民家

爲亂兵所弑踐位亦二年年二十凡二主共四年起  
丁未終庚戌

漢元錢通典曰乾祐元年四月膳部郎中羅周裔請  
在京置錢監俾銅盡爲錢以濟軍用洪志曰徑一寸  
重三銖六參其文曰漢元通寶字文明坦制作頗精  
蓋懲天福之弊則漢代所鑄明矣





## 後周


太祖郭威者邢州龍岡人仕漢官太尉契丹入寇李太后命威擊之至澶州將士亂推威爲主擁之南行以太后命令威監國尋卽帝位國號曰周改元廣順凡三年壽五十三起辛亥終癸丑按帝少貧賤黥其項爲雀形世謂之郭雀兒然卽尊後頗多善政罷貢獻恤生民重儒學如曲阜謁孔子祠旣又拜其墓焉傳世宗恭帝禪位於宋太祖凡三主計九年起辛亥終已未

世宗名榮本姓柴氏太祖無子以柴后兄守禮之子爲嗣在位六年改元顯德壽三十九按帝省刑薄賦重農務本用文任武各盡其能修通禮正刑統皆可施之後世漢唐以來稱爲有道賢君之首伐唐得江北四州江淮始通舟楫伐契丹關南悉平淮南饑命以米貸之或曰民貧恐不能償帝曰民吾子也安有子倒懸而父不爲之解哉又嘗好夜讀書偶於文書囊中得長三寸餘木題云檢點作天子時張永德爲殿前都檢點乃命趙匡胤代之至恭帝時其言果驗





周元錢按五代史周紀曰世宗卽位之明年廢天下  
佛寺三千三百餘所時國中乏錢詔悉毀銅佛以鑄  
錢又蘇耆開譚錄曰世宗於後殿設鑪數十親觀鼓  
鑄李孝美曰此錢徑一寸重五銖文曰周通元寶製  
特精工與唐之開元錢同其背文亦有掐文及星文  
者此錢今皆稱爲周元錢亦有光幕又一品幕作龍  
鳳形者可以塞地下泉穴





大周元弘李氏錢譜曰周元錢另有一品大者重一兩但傳世絕少不易得耳



錢志新編卷九

雲間張崇懿麗瀛校輯


南唐

烈祖李昇者字正倫唐憲宗子建王恪元孫恪生超超  
生志仕爲徐州判司因家焉志生榮喜浮屠號李道  
者於僖宗光啟四年生帝於彭城六歲而孤遇亂伯  
父球及母劉氏避地至濠州楊行密見而奇之養以  
爲子密子渥不能相容復與大將徐溫爲子冒姓徐  
名知誥及長身長七尺廣額隆準爲人溫厚有謀重


儒好學勤儉寬仁爲政封齊王遂禪吳主位改國號曰唐典章輿服一遵唐制在位七年壽五十六有古賢主之風焉傳元宗景後主煜凡三主共二十九年宋太祖滅之起丁酉終乙亥



元宗名景初名璟烈祖子在位二十年改元凡二保大十六交泰四寬仁大度更優於烈祖謙讓不名大臣延公卿講論政體多才藝好讀書善騎射慈和恭儉睦族愛民裕然有人君之度焉殂年四十六

保大錢王圻稗史彙編曰保大元寶錢南唐元宗鑄





唐國錢唐史曰元宗以府藏空竭錢貨益少乃更鑄  
唐國通寶錢以二當開元錢一洪志曰此錢有徑九  
分重三銖者徑七分重二銖二參者徑寸二分重八  
銖者形制相肖並篆文又有徑八分重二銖六參字  
含八分及隸體背上作一圓點者五品中爲最少






大唐錢馬令曰元宗鑄大唐通寶錢與唐國並行洪  
志曰徑八分重二銖四參有徑七分者文並隸體



永通錢南唐書曰景鑄大錢以一當十文曰永通泉  
貨又有泉寶徑寸七分重十八銖字八分書背面皆有周

郭肉好洪志曰此錢有三品徑寸五分重八銖七參者八分書背面肉郭好徑寸三分重五銖七參者篆文輪郭厚重銅色昏暗及背作龍鳳形者爲三種




後主名煜字重光元宗子在位十五年殂時年四十二  
以七夕生自幼聰悟好讀書善屬文工詩畫明音律  
七夕卒

爲詞家之冠美風儀目重瞳子天姿純孝嗣位初值

國削帑空卽蠲租息役以裕民力故專事中原不憚  
卑屈境賴以安蓋亦賢主也而卒亡其國者實爲宋  
運方興耳宋太祖封爲太傅違命侯子姪皆錄用之  
太宗朝進封隴西公殂贈太師追封吳王

開元錢按綱鑑彙編曰後主四年三月行鑄錢其錢  
之大小一如開元文亦如之用徐鉉篆文比舊錢稍  
大而輪郭深濶以鍤錢六權銅錢四行公私便之







## 前蜀

高祖王建者字光圖舞陽人隆目廣額狀貌偉然少無  
賴嘗竊人牛馬里人謂之賊王八唐僖宗時官永平  
節度使當時號爲虎將唐亡建伐梁仍稱天復年號  
已旋并兩川稱帝國號曰蜀僭位十一年改元凡五  
武成三永平五通正一天漢一光天一傳子後主衍  
後唐滅之共二主計三十五年起後梁開平二年戊  
辰終後唐同光四年丙戌


永平錢李孝美曰王氏鑄徑七分重三銖形製粗惡




通正錢



天漢錢




光天錢李孝美云三錢形製大小輕重與永平同





後主衍初名宗衍僭位七年改元二乾德六咸康一信  
任中官貪悅女色立錦步帳嘗擊球其中後宮皆帶  
金蓮花冠衣道士服與太后遊青城山宮人衣服皆  
畫雲霞飄然望之若仙又與韓昭等爲狎客同諸婦  
人日夜酣飲不理國事以及於亡初唐莊宗使李嚴  
聘蜀見蜀都士庶簾帷珠翠夾道不絕而衍驕盈歸  
而勸莊宗伐滅之

乾德錢徑七分重三銖形製與前同



咸康錢洪志曰蜀錢皆重三銖獨咸康重三銖三參

有元寶通寶二種製並粗惡




## 後蜀

高祖孟知祥者後唐太祖弟克讓婿也官西川節度使時東川節度使董璋爲其下所殺知祥遂并有之明宗封爲蜀王尋稱帝僭位四年改元明德傳子昶是爲後主宋太祖滅之共二主凡四十一年起後唐同光三年乙酉終宋乾德三年乙丑

後主昶僭位二十八年改元廣政信用宵小屏棄忠良日事遊宴李太后屢諫不聽性復驕奢淫佚後宮所用溺器皆以七寶粧之



廣政錢後蜀史曰明德三年十二月丁亥申銅禁明年改元廣政洪志曰此錢徑九分重三銖銅質渾厚字文八分書



閩




太祖王審知者固始人梁利封爲閩王狀貌雄偉以材  
器知名常乘白馬號曰白馬三郎傳王延翰王璘始  
稱帝王昶王曦王延政降於南唐凡六主計五十三  
年起唐景福三年癸丑終後晉開運二年乙巳

開元錢陶岳曰王審知鑄大錢錢甚粗重文亦開元



太宗王璘初名延鈞僭立一年改元永和淫亂悖理好鬼神任妖巫納父妾爲后寵幸歸守明號爲歸郎後爲皇城使李倣所殺

永和錢見錢志有此二品




景宗王曦初名延義篡姪即位僭立四年改元永隆曦亦淫侈無度酒色昏沉嬖妃尙氏生殺惟命曦甥李仁遇以色嬖之遂用爲相後曦出醉歸朱文進連重



遇使人就馬上拉殺之



永隆錢閩史曰永隆四年八月鑄永隆通寶大錢錢以一當十當鉛錢百洪志曰徑寸四分重十銖二參文字夷漫製作不精以銅爲之五代史不載而十國志又遺銅品



閩主王延政曦之弟稱帝於建州改國號爲殷建元天

德凡三年後仍號閩南唐滅之

天德錢聞史曰天德二年鑄天德通寶大錢錢以一  
當百董道曰天德重寶穿上有殷字洪志曰亦有銅  
者



南漢

高祖劉龔者本名巖因白龍現乃採飛龍在天之義作

此龔


音

字爲名父謙官封州刺史卒子隱代之梁封

南平王龔龔隱職遂稱帝於廣州國號曰漢據嶺南  
四十七州地身長七尺垂手過膝好自矜喜奢侈聚  
珍寶爲玉堂珠殿性慘酷造剝剔炮炙之刑更置毒  
蛇水中以罪人投之稱水獄用宦者掌國政僭位二  
十五年改元凡三乾亨八白龍三大有十四傳殤帝  
玢中宗晟更濬酷設鑊湯鑊床等刑號生地獄連殺

兄弟十二人并其子納女充後宮卒子鐸仍復凶暴  
宋太祖伐滅之凡四主共五十五年起梁貞明三年  
丁丑終宋開寶四年辛未



乾亨錢李孝美曰乾亨重寶錢徑七分重六銖洪志  
曰大者徑寸餘泉寶錄曰大有元寶錢南漢鑄




# 楚

武穆王馬殷者字霸圖鄆陵人以材勇聞後梁封爲楚王有湖南北十州地寬慈樂善頗著仁聲然多內寵嫡庶無別諸子卒以此亂國在位二十四年傳子希聲希範希廣希萼希崇降於南唐凡六主共五十六年起唐乾寧三年丙辰終後周廣順元年辛亥

乾封錢按楚史曰馬殷時高郁請鑄鍐錢圓六寸文曰乾封泉寶以一當十洪氏泉志曰徑寸七分重十七銖以銅爲之



天策府寶錢張台曰馬氏錢也董道曰馬氏建天策府因鑄此錢洪志曰此錢徑寸七分重三十銖二參銅質渾厚字文明坦史氏失其傳



燕

劉守光者父仁恭唐昭宗時官盧龍節度使善穴地道以攻城軍中號劉窟頭性驕侈貪暴有愛妾羅氏與守光通仁恭杖斥之守光遂囚其父選境內男子十五以上七十以下得二十萬人黥其面文曰定霸都諷諸鎮尊已爲尙父後梁封爲燕王僚屬獻受冊儀無郊天改元事守光怒遂稱帝改元應天凡三年晉王李存勗兵入執守光父子斬之

應天錢董道曰幽州劉守光鑄錢曰應天元寶背文

有一万字

